

UMP Hulur Sumbangan Bantu Mangsa Banjir di Kalangan Pengamal Media



Kuantan, 28 Januari - Seramai 25 orang di kalangan pengamal media yang merupakan mangsa banjir dari Kuantan, Maran, Temerloh dan Pekan menerima sumbangan bantuan kelengkapan pembersihan, selimut dan bekalan makanan sumbangan Universiti Malaysia Pahang (UMP) yang berlangsung di Dewan serbaguna Radio Televisyen Malaysia (RTM) Pahang hari ini.

Sumbangan diserahkan Naib Canselor UMP, Profesor Dato' Dr. Daing Nasir Ibrahim diiringi Pengarah Penyiaran Negeri Pahang Radio & Televisyen Malaysia (RTM) Jabatan Penyiaran Kawasan Timur, Zubad Ibrahim dan Presiden Kelab Media Pahang Nik Naizi Husin dan Pemangku Pendaftar, Abd. Rahman Hj. Safie.

Menurut Dato' Dr. Daing Nasir, dalam kesederhanaan majlis ini mengandungi makna yang mendalam dan tujuan yang ikhlas bagi menyampaikan sumbangan kepada rakan-rakan media yang ditimpa musibah bencana banjir baru-baru ini.

"Walaupun sumbangan ini tidak dapat mengatasi kemusnahan harta benda yang mangsa banjir lalui, namun diharapkan ianya dapat meringankan bebanan yang ditanggung," katanya.

Menyingskap kejadian bencana banjir yang melanda negeri Pahang pada 24 Disember tahun lalu banyak memberikan pengalaman kepada pihak universiti amnya dalam mengurus bencana seperti ini. Apatah lagi ianya melibatkan beberapa daerah Kuantan, Pekan dan Maran yang mana berdekatan dengan kampus Universiti Malaysia Pahang (UMP).

UMP juga dilantik sebagai Sekretariat Pasca Banjir Negeri Pahang dan sebagai pusat penyelarasan program kesukarelawanan IPT dan dengan kerjasama Majlis Sukarelawan Universiti Malaysia (MASKUM) menjayakan OPS Tumpat 1 dan OPS Tumpat 2.

Seramai 118 sukarelawan daripada Persatuan Pegawai Tadbir dan Iktisas (PPTI) dan Kesatuan Staf Sokongan UMP (KESUMP) bagi membersihkan tiga sekolah yang terjejas banjir iaitu di SK Telok Jering, SK Sungai Pinang dan SK Pulau Beluru.

Katanya, walaupun menghadapi sedikit kekangan berikutan tempoh minggu ulangkaji dan peperiksaan akhir, UMP masih mengambil inisiatif proaktif dalam membantu mangsa banjir sama ada pelajar, staf dan masyarakat setempat dengan mewujudkan JK Bertindak Bencana Banjir UMP yang beroperasi di kedua-dua kampus Gambang dan Pekan.

Beliau mengharapkan sedikit sumbangan ini dapat membantu dan meringankan beban mangsa banjir dan keluarga untuk terus tabah dalam membina kehidupan selepas ini seperti sedia kala apatah lagi kerjaya sebagai wartawan mahupun pengamal media ini yang banyak berkorban masa dan tenaga dalam usaha mendapatkan berita terkini untuk disampaikan kepada masyarakat tidak kira semasa ditimpa musibah dan sebagainya.

"UMP juga mengusahakan sebuah rumah penempatan sementara untuk mangsa banjir di Kg. Aur Gading Kuala Lipis yang dibina staf Fakulti Kejuruteraan Awam dan Sumber Alam (FKASA) berbentuk pasang siap apabila rangka binaan dibuat di makmal UMP sebelum siap dipasang dalam tempoh lima hari," katanya.

Dato Dr. Daing turut menghargai komitmen warga UMP yang telah berpadu menggembeling tenaga menjalankan aktiviti kesukarelawan bagi membantu pengurusan mangsa banjir di pusat-pusat pemindahan serta operasi pasca banjir melibatkan bangunan kemudahan awam yang terjejas terutamanya sekolah, rumah orang tua, anak yatim, masjid dan dewan orang ramai.

Sementara itu, Zubad dalam ucapannya menghargai kesungguhan UMP dalam membantu mangsa banjir di negeri Pahang dalam kesibukan warga kerjanya memainkan peranan dalam mendidik anak bangsa di menara gading. Begitu juga dengan Nik Naizi dalam ucapannya mengucapkan setinggi-tinggi penghargaan terima kasih atas ingatan UMP dalam menghulurkan sumbangan kepada pihak pengamal media.

Manakala menurut Pengarah Penyiaran Negeri Pahang, RTM, Zubad Ibrahim pula berkata amat berbangga dengan usaha UMP yang terkenal dengan tugas utamanya untuk mendidik anak bangsa, namun universiti ini mampu memperluaskan aktiviti bantuan dan kesukarelawan di merata tempat yang memerlukan pertolongan.



Beliau melihat dalam bencana banjir ini, sikap rakyat orang Malaysia yang suka bantu-membantu ini patut dicontohi dan dengan nilai murni ini dapat meringankan bebanan yang mangsa tempuhi.

Menurut salah seorang penerima yang merupakan jurugambar akhbar Utusan, Mohd Zaki Jilan, berkata beliau berterima kasih dengan sumbangan ini. "Jika sebelum ini pihak media sering membuat liputan mengenai banjir, namun pada hari ini kami pula yang menerima sumbangan banjir katanya yang tinggal di Sungai Isap," ujarnya.

Manakala rakannya Su Koli yang merupakan Wartawan Chine Press pula berkata amat terharu dan berterima kasih dengan sumbangan ini. Beliau turut berkongsi pengalamannya kawasan rumahnya telah dinaiki air sebanyak tujuh kali pada tahun ini, namun memandangkan kedudukan rumahnya berhampiran sungai, banyak persediaan yang telah dibuat bagi mengelakkan kerosakan harta benda.

Katanya yang tinggal di rumah pusaka datuknya sejak lebih 30 tahun lalu.

Sehingga kini seramai 8676 orang sukarelawan yang telah berdaftar dan terlibat dalam operasi bantuan yang diselaraskan melalui Bilik Kawalan Operasi Bencana (BKOB) yang di wujudkan di UMP Pekan dan Gambang.

Malah melalui Jawatankuasa Bertindak Bencana Peringkat Universiti ini juga UMP melancarkan beberapa program sebagai usaha menyalurkan bantuan kepada mangsa banjir negeri Pahang dan Pantai Timur antaranya program 1 Staf 1 Bantal yang dijalankan pihak Persatuan Wanita UMP (Matahari), 1 Makmum 1 Sejadah yang dilaksanakan menerusi Persatuan Pegawai Tadbir dan Iktisas (PPTI) dan Dana Wakaf Rumah Kontena yang dijalankan UMP dengan kerjasama UMP Innovest Sdn Bhd, yang merupakan anak syarikat UMP Holdings Sdn. Bhd.

Seramai 80 di kalangan ketua biro dan pengamal media hadir melibatkan krew PahangFM, RTM, Utusan Melayu, Berita Harian, Bernama, Astro, TV3, New Straits Times, Metro, China Press dan Sin Chew Daily.